


東平北征
紀平蜀行
錄錄記





東征紀行錄

撰人 不詳

叢書集成初編

(補印本)

東征集行錄及其他二種

一九三七年六月初版
一九五九年十月補印

商務印書館出版

上海大眾文化印刷廠印刷

東征紀行錄

播景有苗弗靖予奉

命率師撫勦以成化十二年丙申秋九月二十日發蜀
城從眉嘉叙瀘舟行凡十有二日達重慶府自重慶
陸行九日抵播州整歸兵旅凡二十有三日自播州
三日達餘慶長官司又二日達白泥長官司又一日
至黃平安撫司駐劄行事又四十五日始事竣首尾
凡一百奇三日惟行役有誌古人是重况與戎大事
又可無紀因自重慶師行至班師之日凡所經歷山

川與應事接物之槩各備書之且各系以小詩一首
用備他日閒覽吉行不載也

本年十月初八日重慶發軍渡江而南登城南高山
整肅士馬將佐以下壯氣可掬馬上口占四絕句云
長子帥師吾豈敢誤承兵柄付書生南山高處行軍
令龍虎雄才聚柳營又鳴笳疊鼓發渝南手挈三軍
駕兩驂料得東苗諸部落馬前不信是張堪又大酋
山谷恣跳梁

聖主寬仁浩莫量諄示小臣毋妄殺賊魁擒盡更擒王
又十萬貔貅入播來秋毫無犯市門開此行本為安

邊計說與諸苗莫浪猜是日宿百節驛依山而行陂
平相半人不覺勞驛在溪橋之口面燕尾山水聲汨
汨雲山疊翠亦有佳趣更成一詩百里長途險復平
肩輿緩步蹈莎行明朝緣是崎嶇道入播初經第一
程初九日過白渡驛宿綦江縣是日途次大風有寒
意行境有山崑然在東起自重慶城南爲真武山中
爲雲篆在百節爲燕尾在白渡爲鳳冠在綦江爲太
公皆一山發踪綿亘二百餘里轟轟起伏不絕漫不
識其所闕也有詩紀之峰巒凌亂白雲封綿亘東來
幾萬重形勝不同名亦異只堪瞻詵不堪從初十日

宿東溪驛是日微雨過綦江三十里有山名魚梁高不可名土人謂此山直抵播州千里不斷東行百餘里皆高山懸厓曲折艱於趨陟而兩山樹木蒼鬱翹翠可愛亦足以豁幽懷也峰巒潑黛號魚梁萬疊牽連至播陽形勝有餘行部惡宦情到此倍淒涼十一日宿安穩驛是日過桂厓與九盤坡間王扁皆羊腸道若下井登梯居人綦播相叅語音不可省九盤曲折白雲邊下視平途井底連始信前人不欺我分明蜀道若登天十二日宿松坎驛即古夜郎故地蓋李白所貶處去驛不三舍有縣治遺址及竹王祠基尚

存是日過清齋木交二坡甚崎嶇不可登行者宣慰
使楊愛率其部屬逆至境上貴州鎮守總兵巡撫三
司亦遣指揮二人至途間懷古有詩按節三苗過夜
卽徘徊因笑謫仙狂人亡邑廢名空在猶有祠基說
竹王十三日宿桐梓驛其日過九龍山山有合抱青
桐萬樹周圍九山環遶一山在中土人謂之九龍奪
珠又過櫃崖崖如削壁上有懸石如櫃形土人魯班
有木具在內人近視之輒出奇怪殊荒唐可笑爲之
詩曰顛崖懸石形如櫃怪誕相傳鬼物封蓋起一山
環九嶺土人號作奪珠龍十四日宿播川驛俗謂鬼

崖又謂門山其日過滴泪三坡坡皆陟數里迤運陡峻輿夫拾級而上流汗如注予亦步登不里武如重負在足喘息莫之前又過大小二箐雖不高險而廣薦大莽樹陰交合竟日不見天色殊是凄楚已而廣東朱巡撫時傑遣百戶劉昇至詢之舊事歷歷非前日有可感者紀行有詩何代人稱滴泪坡陂陀一望更嗟峨輿夫踟躕頓揮汗拾級行行費力多十五日宿永安驛俗名四渡水是日過樓山多磔砢圓尖獨立如樓連珠數十不止故名中道兩山相峙樹木蒼鬱曲逕百折望之殊覺無路而逆運七十餘里皆能

容八人有與亦可愛也抵晚楊宣慰又率屬來迎道
上有言兩山對峙樹交加一徑潛通百路賒翁鬱不
知天色暝馬蹄薄驛日西斜十六日抵播州爲湘川
驛是日山勢自永安驛至播已漸低路可通車居民
富庶有江南氣象楊宣慰父子率其土兵萬人布營
壘於十里之郊砲馬交作軍容甚都抵城宿宣慰司
謾賦一詩山到湘川勢漸平田連阡陌戍連營居人
萬井青山外雲水中間是播城十七日與楊輝宣慰
計議行軍事宜彭參將遣指揮許昂至十八日馬布
政馴張僉事子言至彭參將再遣百戶譚兵事至十

九日貴州都指揮許昂遣平越衛江指揮議進止二

十日陳蒙爛土舊土官張冕子永慶率其子與部屬

三人泊天壩苗平寨首保阿利遣其部苗阿添皆至

納款示以軍威曉以利害給以榜文火牌各苗遂叩

首刻木願以諸寨來歸勞撫而去二十一日出演武

場觀兵犒師條示行軍進止之宜二十二日定行軍

次第二十三日遣典史侯祥往貴州議邊鎮撫毛穎

往酉陽約束土兵二十四日微雨頗寒衣加薄綿二

十五日遣指揮劉忠率合州江津等處兵快千三百

人爲先哨因喜叛寨多聞風納款賦一律識之萬里

遐荒古夜即提兵十日駐封疆攻鐘伐鼓將從事吠
犬跳首漸息狂儒者帥師真自媿遠人遠化正宜傷
試憑一紙昭安檄盡取苗圖獻

聖皇二十六日遣千戶劉泰率巴縣永川各縣民兵千
三百人為次哨二十七日微雪宣慰楊輝父子率其
部屬土兵八千餘人禡纛啓行為三哨再給榜遣千
戶劉顥全頭目楊廣入天壩深寨招安二十八日自
調不謹遂成採薪之憂通夕不寐枕上口占自訟自
喻瘴鄉卧病若為情伏枕支頤百感生藥鼎不除通
夕火漏籌數遍五更聲謬膺厚享宜承罰檢點平生

頗自明斗柄來朝當建子也知剝盡復元亨二十九
日遣指揮李鑛率長寧鏢手千人為四哨貴州都司
差指揮高賢賚文至三十日遣指揮宋禎率江安鏢
手千人為五哨是日二哨官先發十一月初一日貴
州巡撫鎮守總兵遣指揮楊雄來議進止初二日恭
遇

萬壽聖節率屬行禮畢誌喜有詩慶雲扶日上蓬萊

萬歲君王壽域開大地歡聲同舞蹈九天佳氣見昭回
瞻依身在遐荒外忠愛心從炙背來天保詞成備雀
躍臨風欲獻媿微才是日都指揮李璋輕騎先發為

招撫之計已而茂州孫參將差百戶陳祥賚文至初三日原差賚榜招撫頭目何清回備陳招安之由與冊章密秀父叛山苗向撫之意隨差千戶郁貴促三司前進招安初四日晴初五日閱武且犒戎縣鏢手初六日遣百戶王末慶率嘉定等州縣民快千二百人為六哨是日住播已二十日燈下獨坐忽成老母之思為之悵快不勝懷抱賦詩自訟獨坐悲身事高堂有老親音書勞歲月定省曠昏晨霜髮能欺我塵纓解縛人式激徒在誦捲卷益沾巾初七日激雨遣百戶張永讓率式縣鏢手七百人為七哨三司既先

發而米鹽戎馬之事萃於一身殊覺尾瑣因賦一律
自喻且以喻同事者僻壤誰籌筆軍門自拱稽牙旗
朝布令刁斗夜聞擊殺伐非吾志懷柔是本題二苗
雖異種一視總黔黎是日石砭宣撫馬澄率土兵至
初八日犒石砭土兵郁貴回自白泥初九日率師發
播東行馬上有口占曉總三軍發鳴笳吶喊齊瘴烟
隨日散壯氣碍雲低羽旆金輝目花駭鐵裹蹄狂苗
因落膽投款莫猜疑其日循山依澗而行不堪崎嶇
中道登高山立馬四望萬山在目莫知所窮火地水
田殊無隙地蓋土人不事工商竭力耕作然也晚宿

仁水驛立馬高山望遠天層巒疊障畫圖懸林林萬
井深山裏不見人居見竈烟初十日宿湄潭驛其日
甚寒高樹雪片凍合不解望之真瓊林玉樹而行次
深箐高山草莽蔽日茫若無路凝睇山次竈烟如雲
詢之則土地肥饒地利甚厚人樂居之且無訟無盜
蓋過於播中諸處遠矣喜而有詩不問征苗且問民
水田山地兩宜人鄉無盜賊民無訟疑道湄潭別是
春十一日至鰲溪驛宿餘慶長官司其日過土門嶺
與野豬山皆崇山廣箐踰此雖高低曲折亦可容車
自湄潭東行四十里皆湖廣偏衛屯田與播民相叅

住漸東行二十餘里率荒野無人居惟長奔恠石相
為高下然地多巖其一望如黃雲土人藉之克饑民
不滿二里流亡相半而全設正副長官輕肥自若豈
撫綏之失道歎事難懲究詩以紀之征旆行行日欲
西黃茅深處是鰲溪民惟十室官全設誰把流亡戶
口稽十二日宿岑黃驛其日過茅山坎其山蜿蜒自
北而南差我不可名循山趾行二十里為茅坪鋪從
次口東進深谷幽箐竹樹蒙密路在翠微絕頂上下
兩難如此者又二十餘里始出坎度烏江江不甚闊
而東西兩山壁立相峙水如建瓴急流奔湍怒號激

搏艱設輿梁皆以桐槽笊纜貫縛為渡倚岸即登山
高路從天落騎者皆舍馬步登更十餘里為崖門高
峻益甚行者呼喘流汗浹背至絕頂處回首延佇萬
山皆下而猿猱之聲呌號嗚嗚聞之殊為凄楚蓋自
蒸江以東路之崎嶇山之巖險莫有踰於此者山之
西有路通草塘安撫司不百里尚設閔隘土人守之
過江而東皆草塘舊征苗寨自鰲溪至岑黃土人居
者絕少惟崖門有偏橋二屯居人在焉而岑黃在曠
野草莽之區四無人烟岑寂為甚驛官如寓客居僅
茅屋三間而已詩以紀之鰲溪東指是茅坪百種崎

峽未易名鳥道真從天際下馬蹄如在井中行一得
江水人難涉萬仞崖門鬼亦驚自是客懷禁不得猿
猿啼樹更淒清十三日宿白泥驛白泥長官司在焉
其日過小烏江與小脫箐路甚崎嶇土人號狉獍多
住山趾近驛皆偏橋輿隆黃平三衛所屯田頗為富
畏途複道繞羊腸深箐長林走虎狼山水不同人亦
異一般土著號狉獍十四日宿黃平安撫司黃平千
戶所在焉其日過大章大小二箐餘皆高嶺長坡迤
邐斜險不可行三司官楊宣慰與貴州許昂都司各
率官兵中道相迎日西抵城兩舍黃平路行行到日

西箒依山趾去坡與樹梢齊疲馬逢高蹶寒後到處
啼却憐荒服地何事走輪蹄十五日以大壩諸寨久
招不報為憂五鼓時乃具衣冠焚香啓牘卜以靈棋
得二上一中三下之課其象為天陰雲升陽從下興
君子治亂小人畏懲解之者曰陰竊陽位如雲之升
盛陽在下將登九五除逆禁暴衆邪自消小懲大戒
此卦臨人宰制及長吏得之最佳筮畢予乃喜曰事
當濟矣遲明楊宣慰果率乂叛新服苗頭寨長寄保
等十有三人來歸寄保蓋積年賊魁諸寨長所聽節
束者撫諭既畢且自相刻木發誓願以所占田寨還

主刻日各歸原巢冀克殺伐因曲原之犒賞遣歸合
營萬卒聞寄保納款皆咲言啞啞吾黨亦為之解頤
兵法所謂不戰而能屈人之兵者有矣於是益信靈
棋報人之不爽也賦詩識喜遙持節鉞到黃茅盡道
斯行殺氣高龍虎三軍初入境大酋萬醜已投刀變
烟瘴霧隨風散封豕長蛇望壑逃從此播東康定去
干戈高閣不須操其日彭叅將差指揮張英來迎十
六日貴州都指揮司整至自都勻舍人劉清任高自
京回十七日犒酉陽邑梅土兵十八日十九日微雨
指揮李鑛安撫宋韶等率漢土軍兵六千三百人進

重安是日灣溪翁當等四十六寨寨長阿條等六十
有五人詣軍門獻牛二頭并以戈弩納款投服各刻
木發誓悉還原占田寨懇乞罷勦犒賞撫遣而歸詩
以識之天壩田初復灣溪寨亦歸大酋能聽命戈戟
不勞揮次第施仁政權宜息殺機却慙疎淺術萬里
仗

天威平茶土兵至二十日指揮劉忠遣人賫文至鏢手
千六百人前進叅將韓忠遣人至二十一日大雪都
指揮李璋率官兵五千七百一十人通統漢土軍兵
二萬二千八百二十有一人入灣溪撫勦不服苗寨

二十二日宣慰使楊輝率土兵九千人入重安行事
湖廣都指揮鐵堅偏橋衛指揮張齡至二十三日以
楊宣慰等率師東征欲其善始慮終殊切憂懼乃集
古詩句為八章勉之駟驥彭彭爰方啓行既敬既戒
憂心京京又整我六師其會如林夙夜匪懈不顯亦
臨又蕭蕭宵征踴躍用兵上帝臨汝赫赫明明又驕
好人好念子懞懞戎有良翰方叔元老又駟牡駟騤
烈烈征師以謹醜厲無縱詭隨又哀我人斯民亦勞
止豈不夙夜行邁靡靡又征人伐鼓外禦其侮持盈
守成繩其祖武又敬慎威儀績戎祖考世執其功南

土是保二十四日雨二十五日二十六日長至禮成
有詩長至年年在異鄉不禁此日寓遐荒愴悔聲裏
經三月肅殺昔中見一陽天運如車頻自轉客懷與
日共為長浮生碌碌年華邁兀坐書窓思渺茫是日
得灣溪諸苗納款之報二十七日二十八日貴州劉
副使本龔參議晟都指揮張驥蔡英偕至是日千戶
劉顥頭目徐泰自大壩回聞已撫寨首寄保等背約
敗誓將為別圖二十九日遣劉顥徐泰入軍營十二
月初一日貴州三司回初二日彭參將遣指揮方瑛
賚文至黔江官軍至初三日馬布政張僉事入重安

遣驛丞朱敏住清浪是日以天壩苗賊敗誓將事攻
勦復卜靈棋得三上二中三下之課其象為在上方
直下人供職有志不遠所求皆得姑記以俟抵晚遣
百戶程俊入軍營初四日重慶衛指揮左貴率官軍
東進初五日遣土官同知楊鼎入灣溪初六日程俊
自灣溪回馳報連日攻勦削平諸寨斬俘數千人已
而捷報踵至軍門歡聲如雷殊可快也是日孫叅將
黃叅議差百戶韓欽楊雄賚文至初七日遣長官張
淵入營議事其日楊鼎回自灣溪得容山新附四十
三寨與丹章密秀新附三十四寨納款之由丹章蓋

六洞山苗素無官府鈔束者今一旦得之亦可喜也
初八日都指揮許昂差人至初九日百戶程俊入重
安舍人王洪回自荆襄遣指揮宋禎率民鏢入哨其
夜一更漏下十刻迅雷閃電交作良久自西北而東
南如此者二非時而雷良可畏也初十日大軍移營
入天埧十一日遣舍人陳教賚文往湖廣且令順問
老母起居十二日百戶程俊入天埧張淵回自灣溪
朱敏回自清晨移入清平十三日十四日彭都督差
人至宣慰使楊愛兄弟回自重安布政司差吏目吳
俊至十五日寒甚遣百戶楊維入營十六日大雪重

安長官馮琇回自天垣備言諸苗聽撫之由十七日
長官張淵入垣茂州孫叅將差指揮顧恩賚文至十
八日十九日發戎縣鏢手回二十日百戶楊雄回自
軍營二十一日二十二日以駐黃平日久懷抱岑寂
因院壁所函崆峒壽意輒題其上曰驅車兩月駐黃
平世路干戈惱客情何似崆峒諸老子等閑騎鶴下
瑤京是日張淵回自天垣巡按貴州李御史差承差
至二十三日二十四日劉顥回自天垣二十五日郁
貴程俊回二十六日三司與楊宣慰差人馳報自率
師入旅灣溪舟章大垣諸苗或撫或勦彼皆望風披

靡地方克平以是日班師仍留播兵一萬人為備禦
之計以防剽竊鳴笳疊鼓振旅而歸因原其行師首
尾集詩傳句為十章放古人短簫之意用識其事云
其詩曰旂旐央央載飛載揚式遏寇虐不敢怠遑一
章檀車煌煌武夫洸洸柔遠能邇覃及鬼方二章駕
彼四牡四牡孔阜我行既集執訊獲醜三章既出我
車既破我斧剡剡武夫仍執醜虜四章出車彭彭如
雷如霆赫赫厥聲濇觀厥成五章擊鼓其鏜干戈戚
揚以謹無良以綏四方無此疆彼界莫敢不來王六
章我車既攻駕言徂東屈此群醜在泮獻功七章赫

赫業業一月三捷伐鼓淵淵在泮獻馘八章迺陟南
岡既溥既長徹我疆土告成於王九章鼙鼓逢逢以
奏膚公於疆於理

天子之功十章右旂十章一章六句九章章四句是日
貴州鎮守巡撫總兵遣指揮楊雄至二十七日犒勞
回軍二十八日發黃平二十九日過白泥道中有樹
合抱勢干雲霄馬上枝痒披題以詩用紀歲月鳴笳
疊鼓擁班師不用磨崖更勒碑手挈苗圖歸

聖域萬年樹上謾題詩三十日抵餘慶長官司度歲公
寓岑寂百感縈懷悵然有作暫憇征驂度歲除感時

閱已謾躊躇過來歲月應難復老至聰明漸不如浮
世幾何常作客遐荒萬里獨馳車遙知故國高堂上
白髮慈親正倚閭成化丁酉元日偃指犬馬之年為
五旬檢點平生多為謬妄望道茫茫孔子所謂五十
無聞韓子所謂聰明不及於前時道德日負初心者
予皆備之矣拜

天舞蹈之餘輒有口占自訟萬方民物共欣欣又見春
光浦紫氛回首五旬成漫浪浮生百歲喜平分光陰
荏苒年華改道德蹉跎鬢雪紛遙想故山風致好幾
時容我息勞筋初二日湄潭道中積雪初消險途泥

淖因念自為播東之役倏忽良久民庶有飛鳶輓粟
之勞士卒有眠霜卧雪之苦茲得凱旋舉有室親之
念晝夜行征雖風霜勞苦有所不憚既喜其歸又復
閱之因集詩傳句為四章以達其意且以自閱云駟
牡駮駮雨雪霏霏二事就緒式遄其歸一章悠悠旆
旌肅肅宵征君子於役式遄其行二章六轡如濡匪
安匪徐僕夫况瘁胡寧忍余三章執轡如組王事靡
盥征夫捷捷適彼樂土四章右駟牡四章章四句初
三日過仁水驛抵播州做裝吉行口占自諭且以諭
人也蕭蕭行李戒征途除却衣冠一物無祇恐傍人

錯描画誤將蕙苒謗明珠右紀行一通自出師至班
師回播至此外皆吉行在所不錄然所紀皆日用常
事若為瑣屑漫浪無所闕紹至於山川道里之險阻
米鹽戎馬之徵調風俗氣候之不齊雲物之變能畜
情之奸深夫役之驅馳臨高履險可驚可愕之事亦
可槩見一人大抵播為古夜即地去蜀二千餘里人
情風俗與蜀頗同而天垣六洞諸地則三苗種落去
播又千里王化不覃實封豕長蛇之區其地險而深
拗其人悍而貪殘蛇蠱醜毒家以為常拂之必中中
之必死喜人怒獸殊無倫理資長鏢大鎗為利以吞

併占奪爲能矧自據有天漂休徭田寨垂三十年所
司頻年招撫莫之或聽終戎大帥亦嘗兩入其地竟
莫能闖其藩籬雖欲為招撫羈縻之計亦不可得今
以書生帥師撫勦而兵戈所至之境皆望風披靡投
戈授首不敢仰抗若笄中之虎繒中之魚乃使數千
家被逐苗民得以唾手光復舊物而我全師凱旋者
豈兵力所能屈服哉蓋群醜積釁深重

皇天悔禍鬼神默懾其狂而又

聖天子威德無遠弗届之所致么麼小子何敢自冒其
功邪夫自興師以來執戟之士卧雪眠霜轉輸心民

勞筋苦骨繹騷一方糜費公帑驅馳焦勞百端叢脞
顧用事之孔艱而成功之不易傳所謂民亦勞止汙
可小康者是已惟諸酋豕心朝誓暮悔卒無常信未
可遽同吾人氣指順使此在馭之者何如耳馭得其
道不失其心彼固馴服雖寇戎為父子苟待之不以
其信殺之不以其時或脔削之肆行或徵求之無度
雖禮義之民不能保其不肖而赤子亦為讐仇况彼
草裳血食之蠻貊哉予故於紀行之後謾贅與師尅
復之難苗醜靡常之性與有司撫馭之道如此用以
自閱且以曉司馭者豈徒為日曆云乎哉

東征紀行錄終



北 平 錄

撰 人 不 詳

本館叢書集成初編
所選今獻彙言紀錄
彙編皆收有此書今
獻在前故據以影印

北平錄

洪武元年秋七月征虜大將軍徐達副將軍常遇春
會諸將於臨清率馬步舟師進至通州元主聞報大
懼集三宮后妃太子同議避兵北行詔淮王帖木兒
不花監國慶童為左丞相同守京城夜半開建德門
出奔上都達等至齊化門外一鼓而克全城時上都
恃紅羅山為藩紅羅山恃上都為援皆不設備常遇
春使人覘知之即以銳騎銜枚具芻糧晝夜兼行八
月破紅羅山及上都元主遂遁去沙漠駐應昌府冬

十月捷至詔改上都為北平府二年故元將擴廓帖木兒以兵犯蘭州時元臣擁兵者皆次第降附惟擴廓帖木兒乘大軍之還復烏合其衆時為西北邊患自以家世封王故又名王保保三年春正月復命徐達為征虜大將軍李文忠為左副將軍馮國勝為右副將軍及鄧愈湯和等征沙漠

上問諸將曰元主遲晉塞外王保保近以孤軍犯我蘭州其志欲僥倖尺寸之利不滅不已今命卿等出師則當何先諸將皆曰王保保之寇邊者以元主猶在也若以師直取元主則保保失勢可不戰而降也

上曰王保保方以兵臨邊今捨彼而取元主是忘近而趨遠失緩急之宜非計之善者吾意欲分兵為二道一令大將軍自潼關出定西擣定西以取王保保一令左副將軍出居庸入沙漠以追元主使其彼此自救不暇應援况元主遠居沙漠不意吾師之至取之必矣事有一舉兩得者此是也諸將皆悅服受命夏四月徐達等兵至蘭州王保保時已引去達等乃追至定西大敗其衆斬首無筭王保保遂棄走漠北五月李文忠等兵至應昌元主前一月已殂其太子愛猷識理達臘僅以數騎北奔去乃獲其皇孫買的里

北平集 四
八刺及其后妃寶冊等物悉送京師六月捷至中書
省上言宜獻俘 太廟

上以帝王之後有所不忍止令其具本俗服見至日

上服皮弁御奉天殿百官具朝服侍班侍儀使引見行
五拜禮見皇太子行四拜禮后妃朝坤寧宮命婦具
冠服侍班禮畢俱賜以中國冠服并給第宅廩餼封
買的里八刺為崇禮侯誥曰昔帝王之有天下必封
前代子孫使作賓王家其來尚矣元失其政四海紛
爭朕以武功削平群雄混一區宇為天下主而買的
里八刺實為元之宗孫此者遣將北征爾祖已殂既

克應昌爾乃來歸朕念帝王之後爰稽古制錫以侯
封爾其夙夜恭慎稱朕優禮之意以元主不戰而奔
克順天命今殂特謚曰順帝且以其后妃不能耐暑
况北狄但知食肉飲酪勅中書省臣務使其飲食居
第適宜若其欲歸當遣還沙漠冬十一月徐達李文
忠師還至龍江

上親出勞於江上達等奉

車駕還宮越明日乃率

諸將各上平沙漠表達表曰乾坤宣五德之運歷數
在於一人帝王開萬世之基功業超於百代千戈載
戢文軌既同欽惟

皇帝陛下聖神合德文武成能天命所歸人心攸戴拯
黎民於塗炭沛霖雨於焦枯奮六師而江漢奠安揚
九伐而荆吳底定旋收淮甸遂畧中原齊魯十二之
山河蕪甸俱下齒薊百年之腥穢一旦廓清既驅羶
毳之群遂復衣冠之治何我師之奏凱而彼孽之再
萌培克鞠頑敢寇攘於邊鄙乘間抵隙乃賊害於忠
良蜂蠆之毒豈可復遺熊羆之師惡容不舉臣等是
用祇承 明詔恭行天誅爰以今年四月之中師至
定西之北逼虜營而築壘出峪口以陳兵將校懷敵
愾之心士卒奮超乘之勇霆驅電掣渠魁棄甲而遁

逃獸駭禽驚虜衆望風而降附吐蕃抱罕之列障無
不土崩忙忽高昌之群酋悉皆面縛山川爲之輝震
草木爲之昭蘇靈漿之迎無思不服幅員之廣有德
必歸臣等仰遵廟筭之成聿獲大勲之集治平有象
適遭千載之期功德難名願祝萬年之壽是日禮成
達等退自西塔皇太子親王及文武百官各上表賀

次日

上躬詣郊廟大告武成命大都督府兵部錄上諸將功
績吏部定勲爵戶部備賞物禮部定禮儀翰林院撰
制誥以封功臣又次日

上御奉天殿皇太子親王侍丞相率文武百官列於丹
陛左右

上召諸將諭之畧曰汝等其聽朕今日定封行賞非出
已私皆倣古先帝王之典籌之二年以征討未暇故
至今日思昔創業之初天下擾亂群雄並起當時有
心於建功立業者徃徃無法以馭下故皆無成朕本
無意天下今日成此大業有非人力之所致是皆天
地神明之眷佑然而起兵以來諸將從朕被堅執銳
以征討四方戰勝攻取其功何可忘哉是用報以爵
賞其新附將帥之有功者亦如之其次第皆朕所自

定至公而無私如左丞相李善長雖無汗馬之勞然
事朕最久供給軍食未嘗乏闕右丞相徐達朕起兵
時即從征討四方摧疆撫順勞動居多此二人者已
列公爵宜進封大國以示褒嘉余悉據功定封書云
德懋懋官功懋懋賞今日所定如爵不稱德賞不酬
勞卿等宜廷論之無有後言諸將皆頓首悅服遂頒
行爵賞封公者六人宣國公李善長授開國輔運推
誠守正文臣特進光祿大夫左柱國太師中書左丞
相進封韓國公食祿五千石信國公徐達授開國輔
運推誠宣力武臣特進光祿大夫左柱國太師中書

右丞相進封魏國公食祿五千石綺帛各百疋開平
王常遇春子常茂封鄭國公馮國勝封宋國公李文
忠封曹國公鄧愈封衛國公俱授開國輔運推誠宣
力武臣特進榮祿大夫右柱國並食祿三千石綺帛
八十疋封侯者二十八人湯和封中山侯唐勝宗封
延安侯陸仲亨封吉安侯周德興封江夏侯華雲龍
封淮安侯顧時封濟寧侯耿炳文封長興侯陳德封
臨江侯郭子興封鞏昌侯王志原封六安侯鄭遇春
封滎陽侯費聚封平涼侯吳良封江陰侯吳貞封靖
海侯趙庸封南雄侯廖永忠封德慶侯俞通源封南

安侯華高封廣德侯楊璟封榮陽侯原鐸封蘄春侯
朱亮祖封永嘉侯傅友德封潁川侯胡均美封豫章
侯韓政封東平侯黃彬封宜春侯曹良臣封宣寧侯
梅思祖封汝南侯陸聚封河南侯俱授開國輔運推
誠宣力武臣榮祿大夫柱國其食祿及綺帛各有差
並賜誥命鈔券乃詔天下曰曩者有元失馭海宇紛
爭朕自布衣奮身行伍覩群雄之無力遂率衆渡江
撫太平定建業選將練兵征討四方者幾二十年荷
皇天宗社之眷山川百神之助諸將效謀六軍用命遂
致華夏清寧蕃夷臣伏一統之業屬予一人今者班

師振旅定功封爵朕重念諸將士委身暴露艱苦之
狀欲加重賞則天下守鎮之兵及京師護衛之士不
下百萬而民之資力有限是用計倉庫之所儲度民
力之所具均其等第崇爵祿頒金帛以勞將臣仍稽
古制定勲爵俾其子孫世襲軍士則各賞銀十兩錢
六千文朕之此言通於天地昭布中外咸使聞知乃
大宴諸功臣宴罷因曰創業之際朕與卿等勞心勞
力艱難多矣今天下已定朕日理萬機不敢斯須自
逸誠思天下大業以艱難得之必當以艱難守之卿
等今皆安享爵位優游富貴不可忘艱難之時人之

常情每謹於憂患而忽於宴安然不知憂患之來常始於宴安也明者能燭於未形昧者猶蔽於已著事未形猶可圖之患已著則無及矣大抵人處富貴欲不可縱欲縱則奢情不可佚情佚則淫奢淫之至憂危乘之今日與卿等宴飲極歡恐天下定而忘其艱難故相戒勉也明日魏國公徐達率諸將詣闕謝上退御華蓋殿賜達等侍坐從容燕語曰今成一統之業皆汝諸功勞達等稽首曰臣等起自畎畝際風雲之會每奉成美出師致討其次第如指諸掌及其成功不差毫釐此天錫

陛下聖智非臣等能與也

上曰曩者四方紛亂群雄並起朕與卿等初起鄉土本圖自全非有意於天下及渡江以來觀群雄所為強者不能自責剽者喜於戰鬪而皆無救人之心徒為生民之患其張士誠陳友諒尤為巨蠹士誠恃其財富則侈而無節友諒恃其兵強則暴而無恩朕獨無所恃惟不嗜殺布信義守勤儉所恃者卿等一心共濟艱危故來者如歸嘗與二寇相持人有勸朕先擊士誠此亦一計然不知友諒剽而輕士誠狡而偽友諒之志驕士誠之器小志驕則好生事器小則無遠

圖故友諒有鄱陽之侵士誠切近友諒稍遠若先擊
友諒則其所以與戰宜速吾知士誠必不能踰姑蘇
一步以為之援也向若攻士誠則姑蘇之城併力堅
守友諒必空國而來我將徹姑蘇之師以禦之是我
疲於應敵事有難易此朕之所以取二寇固自有先
後也二寇既除兵力有餘鼓行中原宜無不如志或
勸朕盪平群寇始取元都兼舉隴蜀皆未合朕意朕
所以命卿等先取山東次及河洛者先聲既震幽薊
自傾且朕親駐大梁潼關之兵者知張思道李思齊
王保保皆百戰之餘未肯遽降急之非北走元都則

西走隴蜀并力一隅未易定也故出其不意反旆而
北元衆膽落不戰而奔然後西征張李二人望絕勢
窮故不勞而克惟王保保尤力戰以拒朕師向使若
等未下元都而先與之角力彼人望未絕困獸猶聞
聲勢相聞勝負未可知也事勢與友諒士誠又正相
反至於閩廣傳檄而定區區巴蜀恃其險遠此持餘
事耳若等可以少解甲冑之勞矣於是達等皆頓首
謝



平 蜀 記

撰 人 不 詳

本館叢書集成初編所選紀錄
彙編借月山房彙鈔澤古齋重
鈔皆收有此書澤古本用借月
版而加釐訂故據以排印

四庫全書提要

平蜀記一卷。不著撰人名氏。載明洪武四年。遣湯和等伐蜀。明昇出降事。後附劉基平西蜀頌一篇。末有袁褫跋。稱定遠黃金開國功臣錄。載平蜀事於潁川侯傅友德、德慶侯廖永忠傳中甚詳。惟平章楊璟與明昇書。乃詳於斯記云。

平蜀記

失名

洪武四年春正月丁亥。上親祀上下神祇。告伐明昇。命中山侯湯和爲征西將軍。江夏侯周德興爲左副將軍。德慶侯廖永忠爲右副將軍。率京衛荆湘舟師。由瞿塘趨重慶。潁川侯傅友德爲征虜將軍。濟寧侯顧時爲副將軍。率河南陝西等處步騎。由秦隴趨成都。先是崇陽侯楊璟。以上命至蜀。諭以禍福。昇牽於羣議。不能決。璟還。復以書曉之曰。璟聞古之爲國者。同力度德。同德度義。義不足則不敢抗。德不足則歸順焉。故能保身家於兩全。流名譽於無窮。福及子孫。族姓長久。反是者。往往取敗。今足下以幼沖之資。籍先人之業。據有巴蜀。默然在位。不咨至計。而聽羣下之議。以瞿塘劍閣之險。一夫負戈。萬人無如之。何此皆不達時變。以誤足下。何則。昔之據蜀最盛。莫如漢昭烈。諸葛孔明佐之。訓練士卒。財用不足。皆取之南。然猶朝不謀夕。僅能自保。今足下疆場。南不過播州。北不及漢中。以此率彼。相去萬萬。而欲以一隅之地。延頃刻之命。可謂智乎。若謂險阻可恃。則三苗之墟不滅。有扈之國不亡。蓋叢魚鳧之鄉。不至足下矣。我主上仁聖神武。遣將用兵。天下無敵。運謀出奇。神明響應。順附者無不加恩。負固者然後致討。以足下先人通好之故。不忍加師。數遣使諭意。又以足下年幼。未歷事變。恐惑狂瞽之說。失遠大之利。故復遣璟。面諭禍福。深仁厚德。所以待明氏者。不淺。足下可不深念之乎。且向者亂雄如陳友諒。張士誠。竊據吳楚。造舟塞江河。積糧過山岳。強將勁兵。自謂莫敵。然鄱陽一戰。友諒授首。旋師陳討。張氏面縛。此非人力。實天

命有在也。足下視此。以爲如何。友諒之子。竄歸江夏。王師致討。勢窮出降。主上宥其罪愆。封以侯爵。恩榮之盛。天下所知。足下無彼之過。而能幡然覺悟。獨斷於心。自求多福。則必享茅土之封。保先人之祀。世世不絕。豈不賢智矣哉。若必欲倔強一隅。假息頃刻。魚游於沸鼎之中。燕巢於危幕之上。禍害將至。恬不自知。環恐天兵一臨。勢不可禦。前日之臣。爲足下謀者。或以郡獻。或以城降。各自爲身計。以取富貴。當此之時。老母弱子。獨不痛心乎。禍福利害。瞭然可觀。逆順之途。在足下審之而已。昇不能聽。至是乃命和等征之。環本儒生出身。故通於文。上諭和等曰。今天下大定。四海奠安。惟蜀未平。朕以明玉珍嘗遣使修好。存事大之禮。故於明昇憫其稚弱。不忍加兵。遣使開諭。冀其覺悟。昇乃惑於羣言。反以兵犯吾興元。雖敗。而而去。然豺狼之心。終懷嚙噬。今命卿等率水陸之師。分道並進。首尾攻之。使彼疲於奔命。勢必當克。但師行之際。在肅士伍。嚴紀律。以懷降附。無肆殺掠。昔王全斌事。可以爲戒。卿等慎之。三月。傅友德攻蜀階州。初。友德陛辭。上密語之曰。蜀人聞吾兵西伐。必悉其精銳。東守瞿塘。北阻金牛。以拒我師。彼必謂地險而兵難至。若出其不意。直擣階文。則門戶旣墜。而心腹自潰。兵貴神速。但患卿等不勇耳。友德受命。至陝。集諸道兵。揚言出金牛。而潛使人覘知階文守備果弱。於是引兵直趨陳倉。選精兵五千爲前鋒。攀緣山谷。晝夜兼行。大軍繼之。直抵階州。蜀平章丁世珍率衆來拒。友德擊敗其衆。生擒其雙刃王等十八人。世珍遁走。遂克階州。進至文州。距城三十里。蜀人斷白龍江橋以阻我師。友德督兵修橋以渡。至五里關。世珍復集兵據險。友德奮兵急攻破之。世珍僅以數騎遁。文州亦克。五月。湯和兵進攻瞿塘關。以江水暴漲。駐

兵大溪口。是月傅友德兵亦至漢江。以水大不得渡。乃令軍士造戰船百餘艘。然蜀人雖失階文。猶恃漢水自固。及聞我師造舟進取。益震恐。友德欲以軍中消息達湯和。而山川懸隔。適江水暴漲。乃以木牌數千。書克階文。月日。投漢江。順流而下。蜀中見之。爲之解體。其丞相戴壽。大尉吳友仁等。方悉衆守瞿塘。以阨三陟之險。及聞階文破。乃分兵守瞿塘。還援漢州。以保成都。未至而友德舟師已逼城下。因迎擊壽兵。大敗之。遂拔漢州。以濟寧侯顥時留守。而自將趨成都。上聞湯和駐兵大溪口。欲候水平進師。恐其逗遛。悞事。適友德捷至。乃下詔責其畏怯。恐失機會。廖永忠聞命。卽率所部舟師先進。和猶遲疑未決。及得木牌於江。知友德已克階文。乃自白鹽山伐木開道以進。永忠師至瞿塘關。以山水峻急。且蜀人設鐵索飛橫橋據關口。舟不得進。永忠密遣壯士數百人。舁小舟踰山度關。以出其上流。人持糗糧帶水筒。以禦饑渴。蜀山多草木。令將士皆衣青蓑。魚貫出崖石間。蜀人不之覺也。度其已至。乃率精銳軍分爲二道。夜五鼓。以一軍攻其陸寨。一軍攻水寨。將士皆以鐵裹船頭。置火器而前。黎明蜀盡銳來拒。永忠已破其陸寨矣。旣而將士舁舟出江者。一時俱發上流。揚旗鼓噪而下。蜀人出不意。大駭。下流之師亦擁舟前進。發火砲夾擊。大破之。遂焚三橋。斷其橫江鐵索。生擒八十餘人。斬首千餘級。溺死者甚衆。明日湯和兵亦至。永忠乃與之分道並進。和率步騎。永忠率舟師。約會于重慶。七月廖永忠自夔州抵重慶。次銅鑼峽。明昇大懼。或勸奔成都。其母彭氏泣曰。事勢如此。縱往成都。不過延命旦夕。今大軍勢如破竹。人皆膽碎。豈更效力。然終亦不免也。不如乞降。以免生靈於鋒鏑。昇遂遣使請降。永忠以和未至。不受。踰旬和至。會兵城下。

是日昇面縛銜璧詣軍門降。和受璧。永忠解縛。撫慰之。是月傅友德兵圍成都。戴壽等出城拒戰。以象載甲士列於陣前。友德命前鋒以弓矢火箭衝之。象中矢卻走。壽兵躡籍死者甚衆。會湯和遣人報重慶之捷。壽等亦得其家書。知重慶已降。而室家皆完。遂無鬪志。遂籍府庫詣軍門降。九月湯和等遣人送明昇并降表至京。詔省部議受降禮。省部言宋太祖乾德三年蜀主孟昶降。及子弟官屬至闕下。皆素服紗帽。進待罪表。俯伏于地。通事舍人掖昶起。鞠躬聽命。宣制釋罪。昶等再拜。三呼萬歲。閣門使承旨。賜昶等襲衣冠帶。昶等再拜跪受。各就次易服。然後入見於崇元殿。閣門使引昶等入。蹈舞稱謝。宣徽使承旨。宣喚昶等再拜陞殿。至御座前鞠躬。太祖親撫問之。昶還位。與其官屬皆蹈舞再拜。呼萬歲出。中書門下率百僚稱賀。今擬明昇朝見禮。上御奉天殿。明昇於午門外跪進待罪表。侍儀使捧表入。宣表官宣讀訖。承制官出制傳昇等皆俯伏于地。侍儀舍人掖昇起。其官屬皆起。跪聽宣制釋罪。昇等五拜。三呼萬歲。承制官傳制衣服冠帶。侍儀舍人引昇入丹墀中。四拜出。丞相率文武百官行賀禮。上曰。明昇與孟昶不同。昶專治國政。所爲奢縱。昇年幼事由臣下。宜免伏地上。表待罪之禮。是日明昇及其官屬朝見。百官稱賀。授昇爵爲歸義侯。賜冠帶衣服及第宅于京師。時全蜀已下。惟吳友仁尙據保寧。冬十月湯和遣江夏侯周德輿。會傅友德等克保寧。執友仁送京師。蜀地悉平。十一月湯和等師還。各上所佩印綬。并所得蜀金印冠冕儀仗及銀印五十八。銅印六百四。總制府七。元師府八。宣慰宣撫司二十五。州三十七。縣六十七。官吏將士五萬九百十八。馬驛一萬三千八百餘疋。

平蜀記不知何人所撰。予觀定遠黃公金、開國功臣錄、載平蜀事于潁川侯傅友德、德慶侯廖永忠傳中甚詳。若平章楊璟與明昇書、乃詳於斯記也。廖公傳後載皇祖御製平西蜀文、未有傅一廖次之語。五言次第、真馭將之明鑒也。嘉靖乙巳清明日汝郡袁駿記。